

Givim mekim save long ol reipis

Dia Edita

Mi laik kamapim tingting bilong mi i go long Wantok Niuspepa na ol pablik i ken lukim. Sapos husat i laik sapatim o agensim rait i kam long Wantok Niuspepa na mi lukim. Tingting bilong mi i olsem, nau planti pasin bilong reip i go bikpela tru long kantri. Na Wantok Niuspepa i askim ol pablik long raitim tingting bilong ol i go long Wantok. Yes Wantok hia nau em tingting bilong mi.

I gat wanpela liklik samting insait long bodi bilong ol man i save kirapim ol man long mekim pasin nogut. Dispela samting ol i kolim spem o wara bilong bol.

Dispela i save fom i go bikpela, taim ol man i pispis planti. Taim em i laik rausim wara i stap long bodi na taim tingting i kirap long wokim pasin nogut dispela spem o wara bilong bol i laik kam ausait na dispela i save kamapim tingting. Nau ol meri na gavman i painim rot long kilim man, husat mekim pasin reip. Dispela tok kilim nau i go bikpela: Tasol taim ol gavman i bin kamapim dispela tingting long kilim ol man husat wokim pasin reip, planti manmeri i no laikim dispela tingting. Nau mi laik kamapim tingting bilong mi.

Inap Gavman i tok orait na givim operesen o katim rop bilong

spem o rop bilong wara bilong bol? Dispela em i wanpela isipela rot we bai i nogat hatwok. Na em i no rot bilong kilim man. Sapos wanpela man reipim wanpela meri orait Polis i mas holim em na putim em long sel, nau arensim wantaim hausik na kisim em-i go long operesen o katim rop bilong spem.

Pastaim long em i go long operesen em i mas baim meri ya pastaim. Taim Gavman i bin tok long kilim man na planti manmeri i bin konfes long noken kilim man. Orait nau em isipela rot mi kamapim long ol pablik i ken lukim na sapatim o agensim, rait i kam

long Wantok Niuspepa na mi lukim.

Laspela tok bilong sapatim tingting i mas lukim long ol pik na dok taim yu rausim bol bilong ol, ol bai i no inap long wokim nabaut. Ol bai i stap tasol. Na man tu sapos dokta rausim bol em bai i lukim nogut olsem na givim operesen na kating rop bilong spem. Mi bilip dispela rot bai i wok gut olsem na yupela mas sapatim.

**MANGIMO HOZOPA
14-MILE
SENTAL PROVINS**

Glasim tingting long Sande lotu na Sabat

Dia Edita

Plis givim liklik spes na mi laik bekim pas bilong Peter Nana bilong Mt Hagen. Brata, i no inap long yumi raitim pas long Niuspepa na stretim dispela bikpela samting long wol. Em yu no inap.

Tasol, mi laik toksave long yu na husat arapela i gat wankain tingting olsem yu, em olsem: "Ol kristen sios long dispela graun ol i bilip long JISAS KRAIST, Pikinini bilong GOD, em i Bikpela bilong ol, ol i lotu long Sande.. Dispela nem "Sande" em i stap long Baibel, na i no long buk bilong Nomorot o Roman Embra. Ating dispela man i lukim long

Baibel, na GOD i givim tingting long ol na ol i senisim sabat i go long Sande, em ol wokim stret. Jisas Kraist em i Bikpela bilong sabat, Mak 2:26-27, olsem yu tok. Na Kraist em i samting tru. I no sabat. Kolosi 2:16-17.

Taim Jisas i stap long Israel, em i go givim tok long em long taim ol manmeri bung long de sabat na malolo na lotu i stap. Jisas i no givim lo na i tok long yumi mas lotu long sabat tasol. Planti taim Jisas i brukim lo bilong sabat, na em wanpela as ol i belhat long em na kotim em. John 5:16-17, na John 9:16.

Long Sande Bikpela Jisas i wokim sampela bikpela wok

long helpim yumi, olsem Jisas i kirap bek, i go visitim ol disaipel planti taim long Sande tasol na em i salim Holli Spirit i kam long Sande tasol na kirapim Sios bilong em. Na ol Sios long graun ol i save bung long dispela de, na lotu long God, na givim Biknem long Jisas Em i bikpela San bilong ol. Yu ken ritim tu Mark 2:21-22.

Brata Peter Nana, sapos yu i gat moa tok, yu salim i go long Wantok na mi lukim. Tenk yu brata. God i ken blesim yu.

**L.KOPA
WAPENAMANDA
ENGA PROVINS**

Asua i stap long ol pablik opis

Dia Edita

Mi wanpela mangi long Seim, Nuku Distrik i agensim toktok bilong Malcolm M. Yaken insait long Wantok Niuspepa long deit Februeri 3-9, 2006.


I tru olsem ol sevis long Nuku Distrik i bagarap tasol em i no asua bilong Andrew Kumbakor. Mista Kumbakor i wokim wok bilong em pinis olsem Open Mema bilong Nuku, na em i givim mani pinis.

Asua i stap long ol wokman i stap long ol pablik opis insait long Nuku distrik. Ol wokman insait long Nuku husat i bosim pablik opis i no trupela ol wokman. Ol tasol i blokim sevis bilong Nuku distrik.

Maski nupela memba i go insait long 2007 ileksen na i winim em, stil wankain paol pasin bai kamap. Inap ol lain i holim wok long pablik opis long Nuku i honas na stretpela lain na wokim wok bilong ol na i no wokim wok politik long opis ol i holim.

Husat i laik sapatim o agensim, rait tasol long Wantok na mi lukim.

**GIBSON ALI HOLEMBA
NUKU
SANDAUN PROVINS**



Katun i kam long Transparensi Intanesenel - Pait egens Korapsen.

**Yu laik autim tingting
bilong yu -
Salim wanpela pas i kam
long Edita long: Ol Pas i go
long Edita P. O. Box 1982,
BOROKO NCD**